

Na osnovu člana 61. Zakona o upravi ("Službeni glasnik BiH", broj 32/02 i 102/09), člana 19. stav 2. tačka a) Zakona o Agenciji za identifikacione dokumente, evidenciju i razmjenu podataka Bosne i Hercegovine ("Službeni glasnik BiH", broj 56/08), te člana 6. stav (5) Zakona o ličnoj karti državljana Bosne i Hercegovine ("Službeni glasnik BiH", broj 32/01, 16/02, 32/07, 53/07, 56/08 i 18/12), direktor Agencije za identifikacione dokumente, evidenciju i razmjenu podataka Bosne i Hercegovine donosi

U P U T S T V O
O SADRŽAJU ELEKTRONSKOG MEMORIJSKOG ELEMENTA
LIČNE KARTE DRŽAVLJANA BOSNE I HERCEGOVINE

Član 1.

(Predmet)

Ovim Uputstvom propisuje se sadržaj elektronskog memorijskog elementa lične karte državljana Bosne i Hercegovine (u daljem tekstu: lična karta).

Član 2.

(Arhitektura sistema)

Funkcionalni opis čitavog sistema dat je u tehničkom uputstvu "Arhitektura sistema elektronske lične karte Bosne i Hercegovine".

Član 3.

(Karakteristike elektronskog memorijskog elementa)

Elektronski memorijski element ugrađen u tijelo lične karte proizveden je od strane kompanije NXP i nosi oznaku Smart MX P5CDO81A6 J3A081GA6. Elektronski memorijski element koristi operativni sistem JCOP v2.4.1 R3. Slobodan prostor za smještanje aplikacija i podataka iznosi 80Kb.

Član 4.

(Aplikacije instalirane na elektronski memorijski element)

- (1) Lična karta sadrži slijedeće aplikacije: aplikaciju glavne ("master") datoteke, biometrijsku aplikaciju, aplikaciju elektronske lične karte i aplikaciju za digitalno potpisivanje.
- (2) Upisivanje aplikacija se vrši u strogo kontroliranoj sredini Centra za personalizaciju, skladištenje i transport ličnih dokumenata tokom procesa izrade lične karte. Naknadno upisivanje aplikacija na elektronski memorijski element nije dozvoljeno.

Član 5.

(Aplikacija glavne datoteke)

- (1) Aplikacija glavne datoteke sadrži sistemske podatke neophodne za pristup podacima. Oni su zajednički za sve aplikacije.
- (2) Sadržaj i funkcioniranje ove aplikacije detaljno su opisani u tehničkom uputstvu "Napredni sigurnosni mehanizmi za mašinski čitljive dokumente: Opće specifikacije".

Član 6.

(Biometrijska aplikacija)

- (1) Biometrijska aplikacija je aplikacija istovjetna aplikaciji biometrijske putne isprave. Prvenstveno je namijenjena za kontrolu prelaska državne granice.
- (2) Sadržaj i funkcioniranje ove aplikacije detaljno su opisani u tehničkom uputstvu "Napredni sigurnosni mehanizmi za mašinski čitljive dokumente: Elektronski mašinski čitljivi dokumenti sa BAC/PACEv2 i EACv1".

Član 7.

(Aplikacija elektronske lične karte)

- (1) Aplikacija elektronske lične karte sadrži podatke iz evidencije ličnih karata. Namijenjena je za potrebe digitalnog predstavljanja, odnosno korištenja različitih servisa.
- (2) Sadržaj i funkcioniranje ove aplikacije detaljno su opisani u tehničkom uputstvu "Napredni sigurnosni mehanizmi za mašinski čitljive dokumente: produžena kontrola pristupa verzija 2 (EACv2), uspostavljanje konekcije autentikacijom lozinkom (PACE), i ograničena identifikacija (RI)Version 2.10".

Član 8.

(Aplikacija za digitalno potpisivanje)

- (1) Aplikacija za digitalno potpisivanje sadrži kvalificirane digitalne certifikate. Namijenjena je za potrebe digitalnog potpisivanja dokumenata.
- (2) Sadržaj i funkcioniranje ove aplikacije detaljno su opisani u tehničkom uputstvu "Beskontaktna elektronska lična karta kao uređaj za siguran digitalni potpis".

Član 9.

(Objavljivanje na WEB stranici)

- (1) Tehnička uputstva navedena u ovom Uputstvu definiramo kao standard i bit će, na osnovu odluke direktora, objavljena na WEB stranici Agencije za identifikacione dokumente, evidenciju i razmjenu podataka Bosne i Hercegovine.
- (2) Svaka promjena sadržaja tehničkih uputstava iz ovog Uputstva podrazumijevat će donošenje odluke direktora kojom se promijenjena tehnička uputstva usvajaju kao standard, a prethodna tehnička uputstva stavljaju van primjene.

Član 10.

(Stupanje na snagu)

Ovo Uputstvo stupa na snagu osmog dana od dana objavljivanja u "Službenom glasniku BiH", a primjenjivat će se od dana donošenja Odluke o početku izdavanja ličnih karata sa elektronskim memorijskim elementom.

Broj 15-01/02-2-91/13
23. januara 2013. godine

Direktor
Mr. **Siniša Macan**, s.r.